

國朝閨閣詩鈔

國朝閨閣詩鈔

第六冊

瑤草軒詩鈔

奉新 閔肅英 端叔

不櫛吟

會稽 潘素心 虛白

澹如軒吟草

臨桂 朱鎮 靜媛

起雲閣詩鈔

丹徒 鮑之蘭 晚芳

修竹廬吟稿

長洲 朱宗淑 翠娟

花語軒詩鈔

歙縣 金若蘭 者香

韻松樓詩集

金匱

顧慈

昭德

味雪樓詩稿

奉新

宋鳴瓊

婉仙

望雲閣詩集

全椒

郭芬

芝田

清娛閣吟稿

丹徒

鮑之蕙

蔭香

第六冊

卷一

閔宜人肅英字端叔江西奉新縣人南城兵馬
司指揮宋鳴珂室工文詞尤精筆札著有瑤草
軒詩鈔浣香閣遺稿

瑤草軒詩鈔

奉新閩肅英端叔

鍊石篇

吾聞女媧聖鍊石會補天至今缺漏處五色相
新鮮瀨靈渾渾爾孰爲鑿之然揚州誰氏鑪選
材何峯顛救敝當救圓補物當補堅胡然秋空
雨萬古猶涓涓神仙怪者說好事愚者傳異論
倘見訶請君觀斯篇

春日臨黃庭內景經有悟

日高花影長春風不能翦玲瓏日未昃鸚鵡光
愈顯絳雲在天際與化自舒卷一寫內景經靈
趣抑何遠真源湛內照秘籙啟奧典中有不死
庭舉世知者鮮放筆來雙鬢松風熟魚眼

課兒詩

賢愚信造物補苴屬人工網以結乃漁稻以耘
乃豐縹緗吾家事稽古代所同不見華堂上九

世膺殊封汝祖今達人汝父文之雄流傳到爾
曹當思紹家風清霜透簷隙時令當嚴冬蘭缸
凝暮紫楫楸煨深紅穿彼九曲力竟此三餘功
爾曹良不惡頭角均隆隆勿學苦叫喚等彼村
兒童會心原不遠瀟泉由發蒙我生幸不頑寄
情筆墨中汝父客天涯汝學殊未充作詩當夏
楚庶用鞭汝躬

昭君曲

玉顏已逐塵沙老青塚千年怨春草當時不自
買丹青死後何緣惜枯槁琵琶調好無睽隔漢
使猶傳出塞拍長門濕盡阿嬌衣秋雁一聲天
地白深閨十五盈盈女不識黃雲在何許譜得
清聲不斷腸日高無人作新語豈知淒涼未忍
說青塚黃昏照明月

樓前曲

輕颺拂夢穿烟破玳瑁梁高燕泥黠簾紋卷水

收不得珍禽微翻一花墮層樓梯空百餘尺交
疏連錢屏白石西北浮雲莫與齊東南日射天
爲赤巨靈孽斷明星瘠幾疊玲瓏當戶擲古光
貼地知川駛短翠入雲看樹直伯勞飛南鴈飛
北杏花深紅李花白藁砧得意應有無手扣刀
鏤問消息

題西湖士女圖

西湖一杯佳麗水葛嶺岩巒盡雲起湖中七十

紫鴛鴦飛入平章高閣裏
內家樓外紫雲騰湖
上樓船正上燈鳳簫
象板紫玉筍芙蓉衣裳攬
瑟瑟西海寧知玉兔微
東方又見金烏白豈知
繁華有消歇歌吹聲中
鼙鼓裂木絲菴冷夜霜
霏道路游魂汗青血
白公隄前楊柳芳蘇公隄
上花枝長未將風味輪
羅綺肯使凋零劇感傷
至今游人如蟻出畫船
爲家花作室請君畫取
杜鵑飛飛上高枝叫斜日

寄外

木落水微波秋風鴻雁過深閨理刀尺極目渺
雲羅夫子遠遊去高堂清夢多平安有消息早
曉到烟蘿

寄琬仙三姑隨任溫州

迢迢山與川異地亦同天得見常因夢相思動
隔年赤城霞氣外玉署晚風前覓得蘭江鯉瑤
函莫吝傳

登鎖江樓浮圖

危磯迴望勢騫騰更上浮圖最上層江漢半從
衣上抹風雲時傍檻前升諸天清梵難爲聽五
月高寒不可勝我欲瑤池謁金母好憑青鳥到
峻嶒

春夜聞笛

遠笛隨春風徘徊聽來久已見落梅花還聞折

楊柳

對雪憶家

記得辭家桃正紅幾年朔吹憶歸鴻
那能對雪不相憶詩在謝家樓閣中

送夫子之吉安

吉陽江樹暮雲低白髮蒼蒼望眼齊
遊子有方原不遠君行只在大江西

第六冊

卷二

潘淑人素心字虛白浙江會稽縣人江西知州
汝炯長女少詹事錢塘汪潤之室庶吉士懷之
毋與妹正心俱嫻吟詠著有不櫛吟

不櫛吟

會稽潘素心虛白

廣昌縣試童子代父閱詩

歲在辛與壬平西試童子百卷復千卷以次積
盈几吾父殫辛勤披覽分彼此閨中偶解詩甲
乙亦漫擬風簷寸晷餘何必皆杜李用意取清
新綴詞去浮靡銅壺隔院催夜深猶未已豈有
鑑衡才聊代親勞耳

學使胡豫堂先生過廣昌索余詩稿

平西斗大城檠戟忽填塞云是文宗來諸生走
且踣吾父接坐談家鄉舊相識索我詩藁看父
命不敢匿其時當仲春花開滿城艷重九却寄
來淋漓墨痕黑手評十五字行閒少紅勒毋乃
涉世故中心悚且惡古人有女箴曰惟議酒食
勿以此詞章情彼紉與織戒之善自藏其儀庶
不忒

入夏

入夏炎猶淺
挑笙午夢清
疎簾移竹影
深柳咽蟬聲
茶淡偏甯味
花開不識名
晚涼誰弄笛
又動故鄉情

王文成誓師處

師是何人誓陽明
一代豪人皆宗理
學我獨重勲
勞藩府窺神器
文臣掛寶刀
而今樟樹鎮
江水去滔滔

龍泉道中

八十四灘水迢迢濺亂流山深多古木路僻少
行舟霜信催紅葉歸心趁白鷗晨昏空有戀行
矣不能畱

梁橋間爲津吏所阻

縱使書生貴何如津吏豪果能持國法未可重
錢刀夾岸人聲沸危檣燈火高客愁眠不穩徹
夜聽風濤

自泰安至鄒城道中作示兒輩

渡河人已過鄒城暮叩重關守吏驚茅舍近時
人影聚鞭梢拂處馬蹄輕一溪黃葉詩中畫十
里紅花客店名爲語汝曹須省識人心可似道
途平

補石亭觀荷

奇峯三百翠迴環花放層巒疊嶂間須識臣心
清似水果然人望重於山亭邊攜客尋香影石

不櫛吟

乙十

如晴川鮮菴書

上留題互蘚斑爲語諸君須領略高風來者好
追攀

浮青閣眺遠

凝望浮空翠色連層樓端合住神仙三山繞郭
炊烟直雙塔凌霄落照圓戀闕臣心常向日望
雲闈夢遠于天雁行吹斷南飛影幾度登臨倍
黯然

抱景樓

城東抱景樓山路平於掌橋下水無聲風吹塔
鈴響

嚴州釣臺

誰改州名姓氏香

本名睦州

釣臺千載屬嚴光豈知

隱士終埋姓當日先生本姓莊

五日

五日懸符艾有香鑑湖東望路茫茫黃魚上市
楊梅熟不待秋風憶故鄉

不櫛吟

題長生殿傳奇

君臣倉卒誤傾城
羅襪空留死後名
難占泰陵
抔土地悔當七夕誓來生

論曲

一曲琴聲兩意投
當釺貫酒不知愁
相如空有
長門賦卻使文君嘆白頭

玉山道中

尙隔蘭谿路幾程
春山布穀早催耕
菜花香與

桃花色直送籃輿過草坪

上灘

青山夾岸水淙淙十丈危湍百尺風爭上上灘
灘上路果然人力勝天工

沅江道中

遠灘流水響層層鏡裏新霜兩鬢增殘雪未消
春水綠半篙斜日過沅陵

第六冊

卷三

朱恭人鎮字靜媛廣西臨桂縣人舉人况祥麟
室刑部主事澍河南糧道澄之母著有澹如軒
吟草

澹如軒吟草

臨桂朱 鎮靜媛

獨秀峰歌

桂林之山甲天下玉笋瑤簪羅四野一山突起
榕城中此山更是巋然者上有古廟凌煙霞下
有深潭任傾瀉前朝藩邸今荒榛誰問金尊與
翠巖旁有嚴君讀書巖萬古藤蘿尙風雅石壁
奇崛不可攀攜壺著屐遊人寡生平未登千仞

岡坐對峻嶒已心寫聞說登山宛登仙一柱擎
天如在把橫看雉堞環江城俯視魚鱗紛屋瓦
青雲梯遠孰追隨碧落碑高恣揮灑羣峰羅列
排兒孫衆壑趨承皆犬馬有時峭立何森嚴有
時如妝殊淡冶冥冥半空香雨來飄飄雙袂天
風惹我觀此山真奇特我聞斯言良非假我意
不在霄漢間在乎山水之間也

春暮

景過流觴節春深咏絮家微風鶯坐柳細雨蝶
藏花泉活媚清沼窗虛籠碧紗相期邀女伴幾
日玩芳華

聽雨

一夜雨瀟瀟隨風幾度飄秋聲喧薜荔餘滴響
芭蕉窗迥燈花暗香寒煙篆消壁間蟲語寂清
夢亦迢遙

日用詩四首

一粟來非易三升食已豐飯抄雲子潔匙捲雪
花融稗稗看秋穫穰穰驗歲功素餐天下是不
獨繡閨中米

種菜誠良策披吟旨蓄詩咬根憐爾輩學圃得
良師生意饒三月嘉蔬備四時蒼氓多此色灌
漑莫遲遲菜

名記醃醕異誰將芥醬儲清香含芍藥妙製做
葫蘆調菜功尤遍和鹽味自如八珍斯是主凡

品特其餘蟹

食品每求新於茲獨取陳含香和以橘沾直取
諸鄰如婦餘風在寒儒得味真醯酸知蚋慕勸
學昔傳荀醋

水東街

浮梁如帶跨東關屋瓦魚鱗處處環諸子衣冠
三代上幾家貧富十年閒春晴客爲看桃過晚
市人多賣菜還最好花橋橋上望煙中樓閣月

牙山

春詞

春來草成茵春去花如雨去來人易衰東風自千古

古才女詩二首

臣妹才思亞左芬芳名遠向九重聞至今香茗留遺集薦入騷壇亦冠軍

鮑令暉

織錦迢迢寄遠方迴文端合訴迴腸才思獨創

新奇格難向人間索和音

蘇若蘭

第六冊

卷四

鮑宜人之蘭字晚芳江蘇丹徒縣人諸生皋長
女戶部郎中之鍾妹運判何澧室與妹之蕙之
芬齊名著有起雲閣詩鈔四卷

起雲閣詩鈔

丹徒鮑之蘭晚芳

鴻鶴山莊題壁

園林不難創所難在基址山水有真趣穿鑿胡
爲爾竭來茲園游水石擅雙美修廊如纒迴傑
閣憑虛起周遭擁翠屏映帶有芳沚遂令俯仰
閒幽意淡如水雖無絲與竹林鳥勝宮徵卻念
搆園人慘淡在經始豈惟入詩意亦復參畫理

吾將藉粉本聊葺荒園裏

讀書臺懷古

書聲不可聽荒臺今尙留山頭銜落月澹比燈
光幽憶昔梁儲君淹雅誰與侔性僻屏鐘鼎耽
書托林邱一唱復三嘆梵音相與酬校讐破萬
卷文選精雕鏤至今千載下吟魂應來游登臺
緬遺跡空聞牧豎謳松濤留古韻鸚語偏輕柔
誰卽荆棘間嘗駐青宮騶攜柑者誰子地下招

十三松前唐竹邊
杜鵑花發紅欲然
花香鳥語一時寂
至今春雨空樓懸
樓空仙去花枝老
佛案香煙空裊裊
五更彷彿杜鵑啼
月照荒山鳴怪鳥
癡情還想玉生煙
絳宮黃鶴招飛仙
頃刻優曇花復現
樓上春光如昔妍

寒夜吟

雪屋寒燈度三九
冰冷紛飄難著手
長裘萬丈廈千間
願大難償化鳥有
茅龍未補風夜號
嬌

兒讀苦紅女勞憑軒放眼繁星高我獨何爲隕
蓬蒿

和論山兄城樓寫望原韻

古堞依川迴蕭辰一倚樓市聲臨暮沸江影抱
城流綠樹將軍寨烏篷釣客舟多情惟宋玉搖
筆賦清秋

春日送浣雲三妹之長安

驪駒歌罷戒行裝岸上舟中兩斷腸江樹停雲

春黯淡樓燈隔水夢悠揚故園月送人千里客
邱書迴雁幾行待得郎君官貴日早攜詩卷喚
歸航

題秋燈課女圖

誰識閨中女傳賢飲冰茹苦度華年栢舟舊誓
貞松節梧館還賡詠絮篇雲外冥鴻悲寡和膝
前雛鳳慧堪憐披圖觸我當時夢猶記篝燈課
選年

秋燈

燈炮續斷帶夜涼常睡遲寒窗廿年苦除爾更
誰知

水仙花

生塵襪自步凌波玉骨冰肌厭綺羅家在江南
雲水窟采珠拾翠寄情多

鮪魚

一江腥雨長潮天雪白銀鱗出網鮮大府嘗新

起雪閣詩鈔

爭早得南風五兩送冰船

第六冊

卷五

朱女史宗淑字德音一字翠娟江蘇長洲縣人
召試廩生雲驤女工詩詞及駢體文著有修竹
廬吟稿德音近稿

卷五

修竹廬吟稿

長洲朱宗淑翠娟

登靈巖

措策上高峯峯峯溼煙靄山勢空嵯峨繁華竟
何在坐久寂無人飛鳥白雲外

冬夜讀寄湘尤妹詩奉贈

白雲淡不流明月簾前迥之子神仙姿詩才特
秀挺展卷契余心一嚮足嘗鼎慨自詩教微唐

宋分畦町不本真性情區區摹刻警正聲日以
遙非君孰能拯風雅得宗師主持功莫竝會須
訪高軒風前吸香茗

聽鶯曲用韋左司韻

輕煙不散雲冥冥雙柑攜酒殊堪聽流鶯往往
如梭織柳色初青憶鳳城出谷欣值新晴候和
鳴早得春風情一聲兩聲花外嬌絮語叮嚀舌
漸調深黃數點誰能及韻入簫韶不虞澁上林

紅樹映朝暎，嘒嘒清圓息。衆喧此時金衣露，猶
溼絕勝堪熟。來田園君不見，繫絲孤燕聲偏促。
紛紛百舌啼新綠，何似如簧鳴林間。鍼砭俗耳
清且閒，百轉枝頭尙未了。重陰不放游絲裊，捲
簾香霧襲人衣。彷彿蘇隄正春曉。

嘉定鄭烈婦行

妾命薄兮奈何，託君子兮絲蘿。洗手作羹兮事
姑姑，色不喜兮婦心獨苦。回問小姑兮，姑意云

何哀哀逐子中心孔憂維妾之故罹此譴尤嗟
哉徒有子婦欲侍堂上靡由庭前樹一朝枯秋
風急啼棲鳥君一去兮妾身孤忍死兮爲此呱
呱天降禍兮孰知其端巢旣覆兮卵不完靜言
思之摧心肝妾不能事姑又不能撫子偷生何
爲餓死相從地下耳白雲悠悠清泉泚泚妾心
苦兮誰知妾命薄兮如此

題趙承旨畫蘭

數枝披拂倚春風
想像王孫翰墨工
忽憶託根空谷裏
可堪移植暮煙中
荃茅變化傷殊轍
黍黍蒼涼閱故宮
一榦一花心事在
所南風格有誰同

贈江碧岑姊

寒夜長吟一卷詩
斯人何幸得同時
直教孔思周情合
始覺班香宋豔卑
經史不妨充蠹腹
文章從此屬蛾眉
慚余筆硯應焚卻
欲步芳塵悔

已遲

月夜聞笛懷清溪夫人

天寒露重不勝情
遙夜披衣坐月明
何處樓中還弄笛
落梅如雪滿江城

詠蘭

空谷無言亦自芳
笑他桃李媚春陽
紛來詎羨騷人佩
好補南陔第一章

滄浪竹枝詞二首

南園草綠暮煙深一曲滄浪世外心明月欲來
幽澗靜松風謾謾起空林

迢遞鐘聲欲度遲千竿修竹影參差當前好景
誰能會正是天寒日暮時

殘荷

蓮房露冷墜輕紅敗葉殘莖碧沼中曾得美人
遲暮意不須憔悴怨秋風

第六冊

卷六

金女史若蘭字者香安徽歙縣人知縣神女性恬靜工詩早寡居常焚香啜茗以筆墨自娛著有花語軒詩鈔

花語軒詩鈔

歙縣金若蘭者香

禽言五首

泥滑滑雨初歇江邊不可行恐墮蛟龍窟

提葫蘆酒可沾花開易謝月易缺人生不飲胡
爲乎

不如歸去省我墳墓風捲紙錢灰烏鴉銜上樹
十載不歸來忘卻門前路

行不得也哥哥山高無路公無渡河行不得也
哥哥

得過且過無小無大口燥唇乾得過且過

龜雖壽

爾頭不出畏日月光爾足不出可以支牀爾作
禍兮投爾於夔湯爾作福兮俾爾壽而康高山
峩峩淮水湯湯爾潛修以休息兮終爾生以徇
祥

獨坐

獨坐綠窗靜長吟有所思花香風定後鳥語夢
迴時碧浪翻來急紅箋到更遲垂楊太多事搖
曳萬千絲

暮春遣懷二首

不繡鴛鴦愛讀書草留書帶拂庭除天邊有夢
憐鴻雁江上何人寄鯉魚好藉風雲揮彩筆休
尋花竹戀郊居高車駟馬家聲舊莫笑題橋客

不如

一鉤羅襪步花陰
冷露無聲月半沈
蝴蝶未迴
千里夢鳳凰
先入七絃琴
更番風緊憐紅雨
咫尺天遙憶碧岑
白雪陽春少
同調天涯何處覓
知音

寄題翠屏洲呈王柳村先生

面面軒窗接翠微
江山如此世閒稀
獨行品重
真高士
四海名傳大布衣
楊柳風醒蝴蝶夢
蘼

蕪煙暖鷓鴣飛曲江亭畔談詩處曾解東坡玉帶圍

見燕

巢新泥未乾雨細絲初翦最喜汝歸來花影和簾捲

四時閨怨四首

春盡不知春海濱春易老不見海棠花斜陽照芳草

泠泠七絃琴彈罷薰風起欲采芙蓉花長江渺
煙水

明月入羅幃新涼已如許四壁盡秋聲蛩語人
無語

燈燼漏沈沈窗稀風烈烈繡被冷如冰昨夜三
更雪

囊琴

竟作囊中物空山月滿林無絃亦如此應爲少

知音

塞下月

煙暝月籠沙
征夫最憶家
勞君遠相照
清淚落
鳴笳

題桃花仙館

休問仙源路
渺茫蓬萊小
劫感滄桑
誰憐一片
桃花影
猶爲才人
弔夕陽

埋雲石

白衣蒼狗本無心石不能言碧蘚侵只恐密雲
埋不住依然出岫便爲霖

水仙花

渺渺江波漠漠煙瑤華風格自天然靈均不作
長沙死更有何人弔水仙

第七冊

卷七

顧女史慈字昭德江蘇金匱縣人甘涼兵備道
光旭次女平湖舉人張熙宇室舉人湘任之母
著有韻松樓詩集

韻松樓詩集

金匱顧 慈昭德

秋蘭

晴光泛崇蘭芳氣挹朝露愛此亭館清無言澹
空素涼風忽已至秋色生瑤圃彈琴見真意流
水緩閒步終當紉爲佩幽賞竟朝暮

雲棧紀行

青蓮昔歌蜀道難讀之已覺心神寒今來雲棧

試登陟撫膺那不增長歎我行正值仲夏節白
日不見雲盤盤猿猴一聲叫何處一車兩馬趨
雲端陡然馬逸不可止過澗陟嶺疾於矢殆哉
岌岌車中人呼吸之間判生死忽驚車如桶底
脫此身已在路旁立出險移時魂尙驚家人問
訛爭來集人言此是煎茶坪寒潭萬丈山峻崢
儻令一墜那得起過客往往傷厥生吁嗟乎蜀
道之難有如此畏途巉巖從此始

永安宮懷古

生子當如孫仲謀景升兒子豚犬儔天生使君
續炎漢英雄蓋世誰與侔惜哉阿瞞東下日力
弱未及收荊州遂令紫髯得竊取從此爭奪成
釁離關張無命旣先殞帝乃震怒興戈矛獠亭
一役嘆蹉跌六飛此地曾淹留手書遺詔付丞
相惟賢惟德真嘉猷千年故址委榛莽空山落
日行人愁東望嶼磯數千里江水湯湯日夜流

月夜

高樓明月滿涼意暗侵衣水帶蛙聲亂風傳清
磬微片雲沈遠碧皓露湛空輝此景人誰悟林
間鳥欲飛

詠蟬

露飲不求飽凌虛翼更輕本來生意淡非欲表
心清斷續吟聲遠飄揚逸興生炎蒸知不避可
與其忘情

盆梅

日掩芸窗歲欲殘，小枝綴玉近雕欄。
暗香襲坐安琴好，素豔欺冰譜笛難。
明月幾回招白鶴，微風何處下青鸞。
浮夢斷增惆悵，淨洗鉛華露指寒。

寒夜追和伯姊見寄韻

暮天蕭索雁南飛，葉盡長林宿鳥稀。
霜月漸臨寒漏永，疏燈自照遠鐘微。
同心苦恨成睽隔，薄

三才
已十六
俗憑誰問是非
荏苒年華春欲老
鏡中白髮苦
相依

卽景

幽草生玉階
春冰皎如雪
樽酒不知寒
影落遙
山月

題石溪橋

花開花落舊山青
碧水流年十二屏
惆悵縣南
風色裏
行人還問石溪亭

白桃花

花開仙嶺白雲寒，定有漁人隔水看。
惆悵東風無限意，月波分影上闌干。

第六冊

卷八

宋女史鳴瓊字婉仙江西奉新縣人九江教授
五仁第三女南城指揮鳴珂妹鄱陽教諭鳴瓊
廣西鹽道鳴琦姊涂建萱室以清節稱著有味
雪樓詩稿二卷

味雪樓詩稿

奉新宋鳴瓊婉仙

題澹思二兄孤篷聽雨圖

涼風八月秋兄有清江行江路值煙雨江風無
時生茫茫失前樹颯颯孤篷聲壓愁無濁醪照
夜惟短檠起坐或支篷倦臥仍橫肱遊子不遑
息飢驅亦人情古來賢達士浩蕩思長征君毋
太寂寥徒使心屏營高堂自健飯棠棣花交榮

披圖忽一笑迴首江天晴

雞鳴曲

東方明星出未高鷓鴣雞喔喔將三號朱門繡幕
紅燈裏管絃徹夜如流水醉踏瓊榆尙未眠那
得聞雞知早起別有撫心煎百慮人生駒隙難
長駐壯士才人盡白頭雞聲日日催時去我吟
風詩無怠荒警雞視夜將翱翔人間鳧雁美君
子肯聽雞鳴多感傷晦明弦望何窮已雞鳴一

曲無相忘

子規

子規子規何悲切年年啼遍青山血不如歸去
聲聲決聲聲那惜和春別催得春歸腸百結催
得月殘心痛絕夢回五更燈明滅擾我愁魂難
共說我本多情歷磨折爾亦含冤苦淒咽子規
兮子規爾啼兮何爲春歸兮月落爾啼兮何爲

關山月

關山月不照行人心惻惻不照黃雲征戍樓際
海窮邊一聲笛關山月夜夜照霜闌霜闌軋軋
鳴機絲絲長絲短憑心度妾悲妾願誰能知妾
不悲宛轉之如絲妾不願團樂之無缺但覺心
如朗月行萬古千年秋皎潔君不見巴陵之水
華山畿嶙峋蕩漾爭光輝高吟關山月不必淚
沾衣

春日感懷

獨有雙眉皺春風吹不開新黃半窗柳冷翠一
簾苦小句和情寫輕箋帶淚裁自知心意苦猶
比斷腸哀

秋草

萋萋連野陌寂寂委平埃落葉豈殊恨寒蟲相
與哀朔風隨地捲野火逐時來記否王孫去蘭
風尚可懷

春酒

市肆交飛舊酒籌風流曾憶典鶴裘逃禪蘇晉
能依佛荷鍤劉伶未解憂對月狂歌思吸海看
花薄暮又登樓江頭幾許呼虛客開似平疇喚
雨鳩

題臨川夢

四夢人歸一夢場風流異代續遺芳夢中說夢
原無著才子憐才更自傷信有奇書翻造化偏
傳癡癖到闍房憑誰粉碎虛空筆再譜鉛山入

夢鄉

夜坐

寒夜寂無聲清幽心獨領
窗開月自浮蕩去梅花影

煮茗

呼鬟汲水泉獸炭紅鑪熱
推出落梅風關門煮香雪

飼蠶

四月飼新鸞筠筐眼頻顧時時拭翠桑反惹鸚
哥妒

遊仙詩二首

靄靄煙霞護玉宮笙簧縹緲五雲中遙聞鸚鵡
傳嬌語又是蟠桃一度紅

聽罷清歌不記名步虛聲裏識飛瓊飄然出盡
瑤臺上陣陣香風吹落英

春日雜詠二首

簾垂簾捲護春寒
花氣如烘隔畫欄
別有奇馨
人未識素琴聲裏度幽蘭

風迴簷鐸夜泠泠
煮茗添香漏未深
錯認碧挑
橫曙影月痕微透小紗櫺

題紅樓夢

病軀那惜淚如珠
鎮日顰眉付感吁
千載香魂
隨劫去更無人覓葬花鋤

第六冊

卷九

郭安人芬字芝田一字貽芳安徽全椒縣人內閣中書汪履基室性至孝取狄梁公望雲思親之義名所居曰望雲閣著有望雲閣詩集

望雲閣詩集

全椒郭芬芝田

長相思擬李太白

長相思在漢陽庭院蕭條草木黃
寒風颯颯露爲霜
空房徙倚愁欲絕
開帷對景徒悲傷
美人迢迢寄他鄉
上有高山之巍巍
下有流水之湯湯
山高水深不得見
夢魂欲度隴阪長
長相思思斷腸

陌上桑

朝採桑暮採桑朝朝暮暮泣路旁蠶老繭稀中
心傍徨兒欲作母衣何以充官糧阿母呼兒勿
傍徨今年盛蠶桑幸可充官糧免吏來催形如
虎狼兒跪啟阿母兒心傍徨念母寒無衣臘月
重嚴寒雨雪霏霏阿母無衣霜風割肌新婦得
聞知仰面向天啼願身化繭纒成絲一半充官
糧一半作姑衣微軀不惜盡但願無已時

山居秋暝

空山微雨歇，秀色晚來昏。
涼意泉中靜，秋聲林外喧。
漁歌歸遠浦，樵唱入孤村。
對此清幽趣，窮通休更言。

暮春山莊率題

地偏人事少，瀟灑興何長。
郊外滿春水，門前多綠楊。
靜觀忘物我，緬古到羲皇。
心與歸雲寂，悠然坐草堂。

秋日懷母

底事天涯久滯留
梧桐落盡已深秋
白雲多事偏當戶
明月無情又上樓
吳地風霜孤鳥怨
楚天烟雨暮猿愁
憑欄漸覺朱顏改
況復高堂已白頭

春日感懷寄外

郊關遙望錦成堆
又是江南落早梅
舊恨不隨雲際散
新愁翻向雨中來
柳因寒重絲常結
雁

識春歸語自哀太息年年當此日寸心那忍便
成灰

采蓮曲

莫唱採蓮曲曲終心自悲怪他沙畔鳥生小不
相疑

玉階怨

夕殿捲重帷葉落秋聲發中夜不成眠坐看星
河沒

自君之出矣

自君之出矣無復當牕織思君如落花時時減
顏色

夜宿近郊書屋

秋來情緒有誰如霜月淒清竹影疎孤館夜深
殘夢醒滿階黃葉雁來初

暮春偶成

珠簾高捲翠雲浮天氣陰晴似早秋日暮小桃

花下立亂紅吹上玉搔頭

第六冊

卷十

鮑宜人之蕙字仲姒一字茵香江蘇丹徒縣人
諸生皋次女戶部郎中之鍾妹同知張舩室與
姊之蘭妹之芬並工吟詠著有清娛閣吟稿六
卷

清娛閣吟稿

丹徒鮑之蕙芭香

水樂洞

太古無宮商聞泉似聞樂千秋無賞音此淵終
不涸幼讀坡仙詩卽欲窮斯壑今秋事幽討不
憚徑率确蒼巖肖巨獸猙猙勢尤卓策杖俯谿
衍雲璈暗中作更聆虛竇音金石相交錯泠泠
悅塵耳不覺日西落

鞦韆曲

芳園四壁花光圍鞦韆動處朝霞飛美人妝成
對花立欲上不上嬌無力搜身一舉穿林梢流
鶯驚起花旛搖翩然反側妙容與隱隱紅潮上
眉宇藕絲裙頓肯游蜂杏子衫輕濕香雨拖烟
約霧東風顛珠翠彷彿雲中斡瑋琤仙珮漱鳴
玉蘭香夢綠相齊肩紅纏雪腕綵索勁綠鬆雲
髮金釵偏小鬟扶下日初轉徙倚花陰息嬌喘

栩栩魂猶夢蝶驚行行足訝蒼苔輒美人會得
春難駐不放芳華等閒度來日清明風雨多落
紅滿地奈愁何

龍井

高秋選勝來錢唐籃輿取道經風篁竹陰四合
上無路泉聲百道迴崇岡昔聞茲山有龍井井
底蒼龍眠不醒更聞高僧有辨才月林結客無
塵埃有龍則靈僧則典瀾茗終年駐軒冕碑碣

模糊蹟半湮林泉森邃名尤顯我來風日正清
幽策杖捫蘿終日留三面嵐光沐微雨四圍霽
色明吟眸丹黃蒼翠紛巖腹天爲游人開繡谷
亭前奇石作雲房山外明湖消霧縠殘僧掃葉
煮寒泉一甌著手清可憐坐覺幽香襲眉宇不
知衆壑生蒼烟何來鐘聲落空碧昏鴉陣陣催
歸客還期十日曉霜濃停車一覽千林赤

錢塘觀潮

錢塘九月楓未凋澄波如練秋天高游人夢覺
先鳥起應侯來看江頭潮俄聞隆隆振坤軸晝
天一線銀光遙溼烟迷離越峰失烈霆震蕩吳
山搖須臾黑飈吹海立颯沓似策扶桑鰲靈胥
怒乘雲霧至素車白馬紛翔翔初疑水犀練烏
喙六千君子戈矛塵又疑陽侯弄風雨揚波激
浪撼斗杓舟人鬪險逆潮上回檣滾滾隨飛濤
喧豗澎湃天半雪花百丈搏風驕憑欄但覺

雙目眩毛髮聳立神魂飄回頭風定片帆出水
天一色烟雲消

韜光庵

石磴高無極迂迴萬竹叢陰崖含雨氣疎磬落
天風吳越窺烟外江湖入座中溯泉登絕巘蘿
洞禮韜公

經舊宅

故宅見時出門庭卅載違尋花三徑在問姓四

鄰非樹老春疑少
梁空燕尙歸悲涼無限意不
語對斜暉

錢王祠

老樹鴉歸碧殿昏
霸圖渺渺弔忠魂
生降潮水韜弓
弩死愛湖山
長子孫姓字不
隨烟浪逝功
勲猶見蘇碑存
至今陌上花開
日綏綏人還唱
墓門

送舸齋遊天台

一年一度越東游已慣天涯不賦愁黃海詩成
剛脫稟緣梅花謝又登舟名山志果追禽向仙
境蹤應遇阮劉料得桃源今尙在洞門雲水日
悠悠

蓮花洞二首

蒼苔老逾厚一徑入幽竹不知烟嵐深古佛全
身緣

洞門氣幽幽花密人難進樵婦日斜來秋紅簪

兩鬢

題紅蕙圖

笠澤風烟弱不支
托根幽圃伴袁絲
素心多恐無人識
略點胭脂爲入時